


Aqajaqqukkut kræfteqarneq





Imarisai:

- 5 Aqajaroq
- 6 Kræfti suua?
- 6 Tinuneq (svulst) suua?
- 7 Kræfti siaruaassinnavaoq
- 7 Nappaammut pissutaasut
- 9 Misissuinerit
- 9 Qinnguartaammik misissuineq
- 11 Misissuinerit allat
- 12 Killiffit sisamat
- 15 Nappaammik killiffilersuineq (Stadium)
- 16 Katsorsaaneq
- 19 Anniarnaveersaartitsinermik nakorsaasiineq
- 20 Katsorsarneqarnerup nalaani kingornalu
- 21 Nappaatip nangeqqissinnaanera
- 21 Malussarnerit eqqumaffissat
- 22 Sumi ikiorneqarsinnaavunga imaluunniit siunnersorneqarsinnaavunga?




Aqajaqqup iggissallu eqqaani imerajuup
soruuiarneqartarfearqarpoq attavilinnik.
Timimi imerajuup soruuiarneqartarfii qinersit
amerlasuut inissisimapput.
Timitta akiuussutissaqarneranut ilaapput. Kræfti
lymfit aqqutaatigut siaruaassinjaavoq.

Aqajaroq

Aqajaroq poorutsitut nukiinnangajattut takorloorneqarsinnaavoq. Ilua ameraasaavoq. Aqajaroq nerisat aqqutaata (iggissap) inalukkallu akornanni inissisimavooq. Angissusia ilusaalu inummiit inummut allanngorarpooq. Nalinginnaasumik 1 liter-i imarisinnaavaa. Latin-erisut taaguuteqarpoq ventriculus, amerlanertigulli nakorsaniit taa-neqartarpooq ventriklen.

Nerisat aqqutaat, imaluunniit iggissap aqajaqqullu akornat taane-qartarpooq iggissap aqajaqqumut ammarnga, latin-erisut cardia.

Aqajaqqup naqqaniippoq inalukkat qulaaniittooq, latin-erisut pylorus, taannalu tassaavoq aqajaqqup inalukkanut ikaarsaarnera. Aqajaroq ullormut 2 liter-it missannik naap isseranik pinngortitsisarpoq, tamanna nerisanik aserorterisussaavoq. Aqajaqqup nerisallu aqqutaata avataanniipput qinersit, taakkua imerajoqarfinnut atapput. Timerput qinerseqarfeqaqaaq, taakkua timitsinni akiuussuteqarfiummata.



Kræfti suua?

Pisariaqaraangat timip sananeqaatai nalinginnaasut amerliartortarput.

Taamaattoq ajoquseraangamik kræftinguussinnaasarput.

Taamaalinerminni amerliartornerat sukasaqaaq timillu sananeqaatai peqqissut nalinginnaasullu aserortarpaat.

Taamaattumik taakkua kræftip uumasuarai navianartunik taaneqartarput.

Timip akiuussutissartaa sananeqaatinut nalinginnaanngitsunut illersuisuuvoq.

Amerlasutigut kræftinnguutilernerminni aserortarput.

Kræftip sananeqaatai avittarput amerliartorlutik tinuningngortarput.

Tinuneq (svulst) suua?

Tinuneq tassaavoq kræftip sananeqaataasa ataatsimoorlutik eqiffiat, tinuneq aamma puinnermik taaneqarsinnaavoq. Tinuneq latinerisut taaneqartarpooq tumor.

Taanna tassaavoq pullartatut ittoq tinuneq killifilik.

Tinunerit navianannginnerusuusinnaapput aammali navianarnerusuusinnaallutik. Navianarnerit kisimik kræftiusarput.

Kræftip sananeqaatai amerlasoorujussuusinnaapput aatsaallu millioniit sinneqalerunik naatitatut eertatut angitigilersinnaallutik.

Imaassinnaavoq tinuneq ukiut 5-10-mut qaangiunnerini aatsaat ima atsigilersimasoq tarrasuunikku takuneqarsinnaalerluni, imaluunnniit attorlugu malunnarsisimalluni. Tinunerli aamma piffissami sivikinnerusumi allartorsinnaavoq. Taamaattumik aqajaqqukkut kræfti inummiit inummut allanngorartumik pinngoriartarpooq.


Kræftip sananeqaataa ataaseq pinngoreeraangami ilaartupallattarpoq, taqarlu akimorlugu aak akuleruffigisinnaallugu. Taamaalilluni timi kræftip sananeqataanik akoqalersinneqarsinnaavoq tinunerillu ilaartorsinnaallutik.

Kræfti siaruaassinjaavoq

Kræftip tinunera alliartorsinnaavoq taqqamullu, imaluunniit qiner-simut ingerlalluni. Taamaalilluni kræfti aakkut qinersikkulluunnit timip sinneranut siaruaakkiartorsinnaavoq. Imaassinjaavoq aamma tinunerit allat pinngortut. Aqajaqqukkut kræfteqarnermut malunnaa-tit nalinginnaanerpaasut tassaapput meriannguneq, meriarnerit, nererusussuseqannginneq imaluunniit naat qulaatigut ippigu-sunneq, ilaat sanigortarput. Kræfteqarfik pingaartumik iggissamut qanittumiissimappat, malussaatit siullit tassaasinnaapput iiumi-naatsitsineq imaluunniit sakissakkut anniarneq tunummut atasoq. Nappaat aamma aakillissutaasinnaavoq, tamatumunnga pissutaavoq kræfteqarfimmiit aanaartoqartarmat, aakillinermut ilisarnaataasoq siulleq tassaavoq qasoqqaneq.

Nappaammut pissutaasut

Ilisimatuuniit ilisimaneqanngilaq nappaammut, danskit akuttuneru-jartuinnartumik atugariligaannut, sunarpiaq pissutaasinnaanersoq. Imaassinjaavoq pinngoriartorneranut pissutaasut arlaliusut. Ilimatsaaneqarpoq bakteria, helicobacter pylori, siusinnerusukkut atugaanerusoq pissutaasoq. Inuit aqajarui nalinginnaasumiit ami-gartumik issilliliortut taassuminnga bakteriaqalernissaminnut qaninnerupput. Kiisalu ilaqtariinni ataasiakkaani atugaasinjaavoq.



Aqajaqqukut
qinnguartaammik misissuineq.
Nakorsaq misissugassamik
tinunermiit ilanngarsissaq.
Misissueriaaseq ateqarpoq
gastroskopi.

Aqajaqqup appasissortaani
saamiatungaani kræfteqarfik
takuneqarsinnaavoq.

Misissuinerit

Qaqutiguinnaq nakorsamiit naakkut misissuinermi tinuneq malussarfingeqarsinnaavoq. Taamaattumik misissuinermi aamma qungatsimi qinersit suanngarsimanersut, aamma nassat imermik imaqarnersut attorlugit misissorneqartarpuit. Taamaassimappammi tamanne kræfteqartuunissamut takussutaasinnaammat.

Nakorsavit erseqqvivissumik nalilersinnaanngilaa aqajaqqukkut ilumut kræfteqarnersutit. Pasitsaassaqrarunili sukumiinerusumik misissorneqarnissat kiisalu misissuinerit annertunerit innersuussutigisavai.

Qinnguartaammik misissuineq

Aqajaqqukkut kræfteqartuuneq amerlanertigut paasineqarsinnaavoq aqajaqqumut qinnguartaammik atortulerluni (gastroskop) misissuinikkut. Qinngutaasaq slangennguuvoq amitsoq aqajaqqumut qanikkoortillugu mangutassaq. Isuanippoq assiliissuteeranguaq immiussissut, taanna iluaqutigalugu aqajaqqup ilua ameraasaalu misissorneqassapput. Kiisalu nakorsaq misissugassamik ilangngarsissaqaq. Misissugassamik ilangngarsineq biopsimik taaguuteqarpoq, tassa mikroskopikkut misissugassamik annikitsunnguamik piigaqarneq. Misissueriaaseq taanna gastroskopetimik iluaquserluni misissueriaatsimik taaneqartarpoq.

Ilaasa iluaagisinjaavaat iggiaq aqajarorlu misissuinerup nalaani silaannalersorneqartarmata, misissuinerli ima annernartiginngilaq allaat sinitsitsisariaqarluni.


Misissuinerit allat

Aqajaqqukkut ilumut kræfteqarneq paasineqarpat pingaarute-qarpoq paassisallugu nappaat aqajaqqup avataanut siaruaassimanersoq. Tamannami katsorsaanissap qanoq ingerlanneqarnissaanut aalajangiisussammat. Sakissat tarrarsorneqarnerisigut paasineqarsinnaavoq kræfti puannut angussimanersoq. Tarrarsuineq alla, CT-scanning imaluunniit nipip maligaasai atorlugit misissuinerimi paasineqarsinnaavoq tinguit anguneqarsimandersut. Misissuinerit marluk annernanngilluinnarput. Aqajaqqup qanittuaniittut ava-taaniittullu qinersit misissorniarlugit misissueriaaseq aamma alla atorlugu misissuisoqassaaq. Nakorsap slangennguaq nipip maligaa-sanik nalaarutaasinnaasoq fjernsynneeqqakkullu malinnaavigine-qarsinnaasoq atorlugu ilu misissussavaa.

Misissuinermi tinuneq qanoq angitiginersoq paasineqarsinnaavoq.


Killiffit sisamat

Aqqajaroq akimut avillugu




Killiffik 1

Tinuneq ameraasamiippoq
imaluunniit aqajaqqup
nukiinut allisimalluni
annerpaamillu
qinersinut marlunnut
siaruaassimalluni.



Killiffik 2

Tinuneq aqajaqqup iigaa
akimorlugu allisimanngilaq
annerpaaniillu qinersinut 15-
ni aqajaqqup eqqaaniittuni
siaruarsimalluni. Imaluunniit
tinuneq aqajaroq akimorlugu
allisimavoq timilli pisataanut
allanuunngitsoq aammalu
qinersinut siarujuuaassimanani.



Killiffik 3


Tinuneq aqajaqqup iigaa
akimorlugu allisimavoq timillu
pisataanut allanut, qinersinut
annerpaamik marlunnut
siaruaassimalluni.
Imluunniit tinuneq aqajaqqup
igaa akimorlugu allisimavoq
timip pisatai allat pinnagit
qinersinullu arfineq marlunnut
amerlanernulluunniit
siaruaassimalluni.



Killiffik 4

Tinuneq aqajaqqup iigaa
akimorlugu timillu pisataanut
allanut allisimavoq, qinersinut
siaruaassimalluni.
Imluunniit nappaat
qinersinut 15-nit sinnerlugit
siaruaassimavoq timillu pisataanut
allanut, imaappoq nutaanik
tinuneqalersimavoq timip
pisataani allani.

Nappaat timip pisataanut
allanut siaruaassimaguni
nalinginnaasumik siaruaattarpooq
qinersinut tingummut imaluunniit
puannut. Amerlanertigut
siaruaanneq taqqakkut lymfip
aqquataatigut ingerlaartarpooq
aakkut ingerlaarnani.





Asseq:inuk Media ApS / Nanortalik - Tasermiut 2010

Nappaammik killiffilersuineq (Stadium)

Aqajaqqumi kræfteqarneq nakorsaniit killiffilersorneqartarpooq im-mikkoortut assigiinngitsut sisamanngorlugit, tassani nappaat sia-ruaassimanersoq apeqqutaatinneqarluni inissitsiterisoqartarpooq.

Nappaatip killiffii assigiinngitsut sisamat:

Nappaatip aallaqqaataa:

Nappaat aqajaqqup iluaniippoq ameraasaaniilluni.

Nappaatip killiffisa aappaat:

Nappaat aqajaqqup iluani nukinnut ingerlasimavoq

Nappaatip killiffisa pingajuat:

Nappaat aqajaqqup silataaniilersimavoq.

Nappaatip killiffisa sisamaat:

Nappaat aqajaqqumiittooq naap iluani allamut siaruaassimavoq.

Nappaatip killiffiani siullermi nappaat aallarnerneqarsimavoq, tassa kræfteqarfik aqajaqqup iluaniippoq ameraasamiilluni. Killiffiup tul-lia tassaavoq aqajaqqup ameraasaaniit nukiinut nappaatip ingerla-simanera. Nappaatillu killiffiata pingajuat tassaalluni aqajaroq aki-mut ingerlaffigineqarsimasoq, killiffillu sisamaat tassaalluni nappaat aqajaqqup avataanut, soorlu nassat qinersiinut siaruaassimasoq.

Nappaat siaruaassimappat siaruaaffii nalinginnaanerusumik tassaa-sarput qinersit aqajaqqup avataaniittut, tinguit imaluunniit puaat. Siaruariornera qinersitigoortarpooq aakkut ingerlaarluni.

Katsorsaaneq

Katsorsaatissatut ilinnut nakorsap innersuussutigisassaa aalajanger-simasuussaaq. Innersuussutaasussaq Danmarkimi nunanilu tamalaani ukiuni amerlasuuni katsorsaataareersimasuuvoq misilittagaqrifiullunilu.

Pilattaaneq

Aqajaqqukkut kræfteqartunut pilattaariaatsit arlallit assigiinngitsut atortinneqartarput. Kræfti aqajaqqup suatungaaniinnersoq apeqquttaillugu nakorsaniit aalajangerneqartarpoq pilattaanissaq sorleq atorneqassanersoq.

Aqajaqqukkut kræfteqartumut pilaanermi kræfteqarfik peerneqartarpoq

Aqajaqqup ilaannaa pilattaanikkut piissallugu ilaanneeriarluni naammattarpoq, taamatut pilattaaneq nakorsaniit taaneqartarpoq subtotal gastrectomi.

Pilattaariaatsimi allami (total gastrectomi)-mik taasami aqajaroq tamarmi peerneqartarpoq. Tamanna imaappoq nerisat aqquataat inalugarlu imminnut atalersut. Nappaat qinersinut aqajaqqup eqqaaniittunut aamma ingerlasinnaammat qinersit pilaanermi ilanggullugit peerneqartarput. Pilattaariaatsit taakkua marluk nakorsaniit atorneqarnerpaasarput, taamaattoq pilattaariaatsinik allanik aamma peqarpoq. Erlavinni nalinginnaasumik bakteriarpassuaqtarmat pilaalinnginnermi antibiotikamik aseruuttoornaveersaammik kapineqassaatit.


Aqajaroq kræftilik peerneqareerpat, inalugaq aqajaqqup amiakku-anut ikkunneqassaaq, taamatut pilaaneq taaguuteqarpoq, subtotal gastrectomi-mik.

Taamaammat nalunangitsumik tupigusuutigissavat aqajaqqup peerneqarnera. Tupinnanngilaq, kisianni tassa ajornanngilaq.

Taamaattoq ilimagisariaqarpat nerisariaatsit allangortissallugu, tassa nerisat annikillisssagakkit nerinissallu akulikillisillugu.


Aqajaroq B12-vitaminimik kiisalu jern-imik timimut pilersuisuummat naatsorsuutigissavat inuunerpit sinnera taakkuninnga pisartaga-qassagavit.

Aqajaqqakkut kræfteqarluni
suliaritinnermi
nappaateqarfiusoq
peerneqartarpooq.



Nappaateqarfiusoq
peerneqareeraangat inaluaraaq
aqajaqqup sinneranut
mersuunneqartarpooq. Taamatut
pilattaariaaseq taaguuteqarpoq
subtotal gastrectomy.






Asseq: inuk Media ApS

Anniarnaveersaartitsinermik nakorsaasiineq

Ajoraluartumik imaappoq aqajaqqukkut kræftip piivinnissaa amerlannertigut ajornartarmat. Nappaat siaruaassimappat nakorsaasiinermi anguniarneqartarpooq inuunerit pitsangorsartuassallugu ippigusuutivillu annikillisartuarnissaat anguniassallugu. Tinuneq ima annertutigisimappat iggissat amilluni, taava nerisavit aqqutissaanik ruujoriusannguamik savimnineeqqanik ikaartitikkatut sanaamik (stent) ikkussisoqassaaq. Taamaattoqanngikkaangat iisaqarniarneq ajornaallisarniarlugu kissattaatitut ittumik qinngortaasoqarsinnaavoq (elektrokoagulation). Kiisalu aamma pilaanissaq ajornavikkaangat ilaanneerierarluni kemoterapiimik nakorsaasiinikkut neriniarneq ajornaallisineqartarpooq. Kemoterapiimik nakorsaasiinermi inuuneq sivitsorneqarsinnaavoq kiisalu ippigusuutit annikillisineqarsinnaallutik.

Titartakkami takuneqarsinnaavoq ruujoriusannguuaq, (stent) nerisaqarniarneq ajornaallisarniarlugu iggissamut ikkussimasaq. Iggissamut asiillarsaat iggissap ammut isuanut ikkunneqartarpooq.



Katsorsarneqarnerup nalaani kingornalu

Pitsasumik paassisutissiineq pingaaruteqarpoq

Nakorsamiit ilinnut siunnersuutaasut tunngaviisa paasilluarnissaat pingaaruteqarpoq. Isumalioruit nakorsaq ataaseq oqaloqatigissallugu naammangnitsoq, taava nakorsamik aamma allamik oqaloqateqarniarsinnaavutit. Taamaalillutit ajornartorsiutaasinnaasut pillugit paassisutissat assigijt aamma ilinnut allamiit tunniunneqassapput. Paassisutissarpassuit ataatsikkut pissallugit paasilluassallugillu ajornakusoorsinnaasarpooq, pingaaartumik aqajaqqukkut kræfti-mut imaannaanngitsuuusumut paassisutissat. Taamaattumik aappaqaraanni, aapparisaq, ikinngutigilluagaq nakorsamik oqaloqateqassatilluni peqataatikkaanni pitsaassaaq. Nakorsamik oqaloqateqarnermi peqataasut najuunnerinnarmikkut ilinnut tapersersuutaasinnaapput, aammali oqaloqateqareernerup kingorna paassisutissat pillugit oqaloqatigiissinnaavusi. Apeqqtissaqaruit nangaanak aperisarit. Katsorsarneqarnerit naammassippat piffissami aalajangersimasumi eqqissimaarnissat pisariaqarpoq. Kingumulli arriitsumik nukittoriar-toqqlissaatit taamaalillutillu nalinginnaasumik inuulerlutit. Sulininni artorsassanngilatit imaluunniit nikeraqattaarlutit pissanngilatit.

Misigisimaguit nukissaqarnerullutit qasooqqavallaarunnaarlutillu, taava sulinerit nikerarnitillu annertusisinnaavatit. Inuunermut nalinginnaasumut siornatigutulli ittumut uteqqinniarneq imaannaanngitsuuvoq.

Napparsimmavimmi sulisuniit ikiorneqarunnaassaatit.

Imaassinjaavoq ilaquuttavit ikinngutivillu ikiorusukkaatsit. Kisiannili imaassinjaavoq paasinngikkaat qanoq eqqarsaateqarnersutit imaluunniit qanoq misiginersutit. Aamma imaassinjaavoq kræfti pillugu oqaloqatiginissat ersissuteqarfigigaat.

Amerlanersaat tupallutik annilaajummertarput kræfteqalernertik paasigaangamikku. Taamatut misigigaanni sivisuumik qaangerniar-neqartarpoq. Nappaatip nangeqqinnissaa pillugu ersiorneq imaassinjaavoq nungunngisaannartoq, piffissalli ingerlanerani annikilliar-tortarpoq. Ersinerit inuuninni piffissap ilaani sallerpaajujunnaaru-maarpooq.



Nappaatip nangeqqissinnaanera

Nappaat nangeqqissinnaavoq. Taamaattumik pisariaqavissinnaavoq napparsimmavimmi akuttunngitsunik misissorneqartarnissat.

Ilimatsaassaqaruit pingaaruteqarpoq piaartumik nakorsiarnisat.

Malussarnerit eqqumaffissat:

- Iisiuminaatsitsineq
- Nererusussuseqannginneq
- Nassuiaatissartaqanngitsumik sanigorneq

Sumi ikiorneqarsinnaavunga imaluunniit siunnersorneqarsinnaavunga?

Kræftimut akiuiniarluni suliniaqtigiiffik, Neriuffik Kalaallit Nunaanni sumiiffinni amerlasuuni immikkoortortaqarfeqarpoq. Ilinnut qaninneraaq sumiinnersoq qanorlu saaffigineqarsinnaanersoq pillugu napparsimmavimmi sulisunut nakorsamullu paasiniarsinnaavat. Imaluunniit Neriuffiup Kattuffia Nuummiittoq saaffigisinnaavat uunga:

Neriuffiit Kattuffiat

Postboks 1546
Aqqusinersuaq 48
3900 Nuuk
Tlf. +299 49 04 89 Fax: +299 31 25 04
E-mail: neriuffik@greennet.gl
Internetikut nittartagaq: www.neriuffik.gl

Saqqummersitsisoq:
Neriuffit Katuffiat - 2010 Ilusaa siulleq, naqiternera siulleq
Ilusilersuisoq: inuk Media ApS · Assit © inuk Media ApS
Quppersakkamit uuminnga nutsigaq: 'Kræft i Mavesækken'
Nutserisoq: Kirstine Berthelsen aamma Johanne Olsen



Neriuffit Kattuffiat
Postboks 1546,
Aqqusinersuaq 48 A,
3900 Nuuk
neriuffik@greennet.gl
www.neriuffik.gl

